

尚

綱

堂

集

尚絅堂駢體文卷二

陽湖 劉嗣綰 醇甫

頤園讀書記

頤園者方伯百菊溪先生讀書處也。拓地十笏，結齋三楹，遠離市廛，略置邱壑。仄逕通曰虛廊，互雲闌折而西，繚以花木小屋，疑艇浮來江湖。危亭補樓，飛入屏嶂。主人旣出，蓬蒿奪門，蟲餘悲號，鳥爲歎息。許子青士避囂其間，遊神蕭遼，涉覽明瑟，得林屋之勝，致申盤阿之晤。言溪童而外，惟攜破書石友不來，迺對古硯，余以暇日巾車來遊。時方窮冬，籬落寒色積，葉平檻樓塵在梁，苔印隔世履綦猶新。竹粉墜空衫袖，忽古幽步徐引，素襟遂開，松吹落落如助。

清吟之聲藤陰盤盤別成奇字之格茶塢四壁蘆簾一重
寓公致佳日夕棲止爐煙出戶隨風低高墨雲過窗與石
凹凸月白而鳥夢長午雨晦則雞棲不晨以茲景光彌觸
身世俯仰傳舍深連索居眷我同好城隅間隔杜老茅屋
難免秋風之歌白傅蕭寺空傳春草之什良會苦少芳時
已非古懽不綿清興斯邈請告諸子爲過從焉僕將抽毫
圖爾主客

龍泉寺記

去宣武坊南二里有龍泉寺焉其地爲下窪子離市較遠
灌莽叢雜竹影補屋槐陰借天寺門洞開一綠無地辛酉
首夏周子倬雲讀書其中時湘岩木天浣香諸子亦移榻

焉余好埜行時一往過癯僧應門面若枯樹古佛臥壁身
餘壞苔歷院數重始達寓室烏團夢於幽棟蟲選言於古
牆草蝶出繭黃於野人之衣風蟬上枝絢成秋士之鬢老
杏一株實可升斗就樹解渴便忘朝饑數子輟讀清談乃
集說劒軌魄吟詩悅魂片石之硯能留白雲小團之茶可
代明月自晨入夕如夏成秋英英風露逼人蕭寒離離星
辰穿樹瑣碎清磬偶發尋聲出門門外古冢累累百數妖
鳥咆窺山魃窺人白楊背風如助吟嘯晞髮散步逍遙其
間蓋至零露沐首始就歸寢也六月徂暑積雨尋丈諸子
別就他舍寺爲空焉余以出郭重過其地廢井空碧頽垣
亂青駢車徑返歸路惶惑驚鴉影之墮地悲馬鳴之向天

蓋如舊識者冢中之人可對語者道旁之石而已嗟乎傳
舍落落誰爲吾廬禪林蕭蕭幾見彼岸乃蜉蝣出穴方閱
夫朝暮蟪蛄在戶已慟夫山邱日月幾何雲煙頓改然則
我輩身世之感豈獨灑淚平泉傷心梓澤哉爰爲記而志
之云爾

蔣邨記

蔣子蔣邨居武林北鄉之杉墩去墩七八里許爲蔣邨其
宋時故居也道南道北阮氏表其清門灤東灤西杜陵棲
其幽舍枌社久徙草堂遂蕪憶楊子之舊廬望陸家之老
屋哦詩之松巘已前代醒酒之石碑成古阡謝公山下空
說兩家之墩丁令宅邊無忘千歲之郭於是指墟里以爲

號雜樵蘇而寫圖懷舊德遂初志也屬者余客西泠訪蔣
邨於湖上之挹青樓屏開斷虹檻落新翠掬水洗眼棲雲
盟心展茲雅圖動我遼想夫以蔣邨植學淵海遊神江湖
豪情薄霄壯志彌野方且好客投轄留賓絕繆婢蓄一陂
之魚奴呼四山之橋封竹盈畝敵千戶之侯擁書數楹傲
百城之主通三千里以置驛給百萬錢而買隣不獨守澗
阿承堂構而已若僕者壯不如人饑來馭我碧山樹老白
社秋荒午橋將廢芳草爲之生愁丙舍未營長楸於焉隕
涕思欲結墅東山置田北郭抱漢陰之甕讀汜氏之書瓜
牛半席足供坐眠茅龍一衣與閱寒暑顧可得哉他日者
逃情邱壑訪舊湖天挂帆越水之陰策杖吳山之側尋鷗

仙剎寺集卷二
三
汎宅與鶴爲隣松風在琴蘿月入幕願言昔夢重話茲遊
蓬蒿三逕蔣詡移家之圖叢桂一山劉安招隱之作斯亦
空谷之希聲幽居之逸緒也已

城南觴月記

壬戌八月既望余客武林同人邀飲於許子穆甫城南之
書舍華月流素秋欲波朋簪忘年芳俎薦夕羅列絲竹
比較壺矢濁酒既醉清遊迺臻遶樹之鵲多於應門之童
出牆之螢炳若行夜之燭縱步所至言尋野田杉柳隱隱
飢鷄互鳴荻簾蕭蕭荒蛤亂吠聲響錯雜影形回惶飛露
著草如吹鬼燈行雲冒樹恍曳仙陂延此幽眺偕登女牆
譙樓鼓聲畫壁弓影相與拊掌雜之行歌老兵嗚嗚吹角

以應清獻。鶻落狂呼。鷹來江岸。邪許之聲。湖心歛乃之響。
浩浩四起。不復能辨。月地忽午。天河已中。星辰高低。風露
升降。千家之夢。方白半郭之烟。自青一笛。撻曉溪魚。不眠
孤鈴。蒼秋塔鳥。先起。感急景之超忽。循歸途於沆寥。夫竟
夕之話。尹班治其琴尊。清夜之遊。徐陳忘其軒蓋。屬以散
人。追陪勝友。離合兩地。喧寂一天。申猿鶴之懷。遂麋鹿之
性。露帶風襟。足娛乎今夕。雲裝烟駕。預訂夫來生。是則有
逢氏之樂。曠茲古今。無懷氏之民。同其旦暮者矣。是爲記。

浮眉樓圖記

郭子頻伽居吳江之分湖。湖流遶邨。寬徑十里。玻璃千頃。
蔚藍幾重。遠山窺人。時出天際。隱隱一髮。亭亭雙鬟。水仙

洗妝湘娥對鏡遂於湖上築小樓顏曰浮眉取昌黎詩天
空浮修眉句也潑眼成翠遊心入元拓屏四圍綴檻一折
日夕棲止坐窗可邀鱗次羣籟吹饌百氏踞談灑雪瑤情
墮煙曲中笛弄風花四飛唾餘塵橫手玉一色每至漁榔
夕響雁檣晨鳴繚白縈青之鄉夢紅浴碧之境負絕塵躡
逍遙仙心飄飄乎儼宏景之三層軼休文之八詠矣若夫
初日照梁朝霞臨檻伊誰絕世中有長蛾隋隄殿角誇絳
仙之黛痕蜀肆爐頭看文君之鬢影然而秋江送別暝色
傳愁孔雀南飛牽牛西望往往錦帶絨恨黃衣奉書笙寒
雞塞之聲簫咽鳳臺之吹殘月兩岸唱紅牙之女郎微雲
一山感白頭之佳婿斯則杏梁少婦海燕銜悽荃壁王孫

營營訴怨望青峯而日莫對碧水以年流蓋自吳江遷居
魏塘且數載矣浣花別業修竹故廬鴻爪常留鷗心自蕩
而僕因君影事梗觸浮生稚川無移家之船鹿門虛偕隱
之約梁鴻宅畔惟警淒涼范蠡湖邊修眉慘淡吾土洵美
余情倦芳循覽斯圖三太息已

小聚沙巷小像記

嘉慶丙寅三月五日趙味辛司馬六十壽製圖及贊綴之
詠言不鄙無文用詔小子余惟先生述德自祖蔚華在國
幼吞丹篆長窺綠圖手研槧人胸鑄匠氏彥和甲觀之譽
君積丁部之書識量既遠丰標斯峻讀范孟博之傳王寂
傾心懸嵇叔夜之圖曼容尙友學若擷影詞能蜚聲宏策

戰射雄文乃薦藥省夕直荷囊晨趨擅常楊之除書誇沈
宋之制誥官未通顯逮歷中外符竹佐郡最於青齊官齋
守素不名猪肝客館戒嚴迺畫虎尾五袴頌其循吏百鍊
表爲青卿乾蔭不居屯災迭搆風雪迫路歸於聖廬廢我
告哀升穀銜恤慕思方永宦情遂輟蓋空桑之戀三宿未
忘桃子之心五仕輒化因悟向子損益之歎兼測仲氏潛
見之旨逍遙絃尊跌宕風雅從荀勗遊能辨鐘制與裴綽
語如聞瑟聲松栢敦其古懽樵蘇樂其清景三世之交共
悅清話一門之內皆稱禮宗惓惓古風吾見罕矣緯咎代
周期蓋伊始道腴旣勝德容彌劭虛佇元素炳茲丹青綃
函甫開巾塵斯接觀河之面未改閱水之身自如足使在

爨之桐平其琴心旣爛之柯玩此奕趣斯愛斯傳陶詠弗
已牽率荒翰重累茲圖

清芬館記

清芬館者王子師竹讀書之室所以述先德循祖訓也祖
贍樞先生以賢書第一人成進士出而令粵之永安先後
家書存者十數裝池成冊藏庋其中蓋令子孫世守焉先
生幼稟穎質少懷異資白傳宿慧之稱黃香孝童之目性
固弟弟學惟經經用能函開九羊文薦一鶚士林之譽弗
替於今焉方其令永安也德被有風令行如水石陳肺以
當路鏡懸心而在堂海疆化其狼烽客館圖其虎尾白水
盟屋清風署亭靜梧亭之獄草鞠園扉行桑隴之春花移

近郭蔚茲治譜勒作家箴往往剖竹通郵栽蕉置驛飲馬
申誠封魚寄書貽清白以製銘雜丹黃而成帙乃者恭聞
庭訓敬企門風僧儒之識仲郢芳矩斯存馬援之訓季良
義方有在而師竹方且流連祖硯枕籍楹書爲熱心香載
瞻手澤出之什襲乞余一言敢以蕪詞特申宿諾文不加
點愧齡石之八十函書不盡言抵茂先之三十乘是爲記

蔣伯生宦跡圖記

在山泉潔遇濟水則伏流出岫雲高臨泰岱而興雨況乎
幼而隨宦繼乃涉官築堂讀書還里遷葬留去思者兩世
頌來暮者一方各具畫圖略志蹤跡豈非稱僅事於齊魯
之間振家聲於勾吳之壤者哉伯生述德自祖蔚華在國

學若擷影文能蜚聲乃屈製錦之才用效傳衣之鉢習其
家世特最青齊龍門千里思底續於宣房蜃樓一重現成
功於海市其中汶上行春圖則係尊甫出治處也桑疇婦
女卽是家人竹馬兒童無非舊識亭有清風之號齋餘白
水之箴癸酉秋適莅泰安靖以鎮之宦途遇難坂驅羊腸
客館戒嚴壁畫虎尾旣遭否運遂播屯災言歸聖廬風雪
迫路牧笛馬塍之側紅簫牛嶺之間足使丁令還鄉讓皇
接冢焉夫其濟上夜讀如對匡廬之屏金鄉聽雨或誤山
陽之笛遊覽足證縉繩甫開炳茲丹青虛佇元素則有金
山人葉山爲之補圖余舊友也今者伯生閱川年逝送海
情長藥桐平其琴心爛柯玩斯奕旨綴此荒筆有累君圖

梁苴隣鐙窗梧竹圖記

竹間避客乃張廌之清風桐葉題詩亦杜陵之韻事願言
山木良託苦岑況乎京國從遊師門結契借停雲而佇友
憑聽雨以傳神則有如我苴隣先生以覃溪師多少鐙窗
梧竹響都憑舊雨爲傳神句補圖寫意是也昔者桐臺
選韻竹院徵歌水石留名風花識面而苴隣以海天之趣
締烟月之緣共仰蘇齋如遊魯壁鄭箋訂舛孔疏尋譌凡
夫周鼓秦鐘唐詩晉帖莫不窺其變奧破厥垣籬於是選
里而居買隣是宅仰屋宜臥坐窗可遨容膝之地叩寂以
求音打頭之鄉談禪而說夢一鐙入夕萬響當秋蓋窗外
有梧一庭有竹一陽焉夫彭城聽雨弟兄增對牀之懷竹

林讀書叔姪結並巷之誼亂松風於石鼎諧蓮漏於銅壺
賈島門外方竭推敲陶潛室中有勞贈答心炙斯語遂成
是圖僕也不文請言其略

潞河秋泛引

甲戌七月十七日子卿侍御約同人爲二聞之遊展七夕
也素秋二七再展填河之期良朋三五一尋盪槳之興言
自二聞泛舟潞河魚遊在空鱗翠若接衝單舸以娛日換
袷衣而憩涼蓼花拜岸雙鴨呼名竹梢靡波一鷗入夢說
中座之戚話辨鄰舡之鄉音吟肩瘦處已入山圖詩骨清
來不離泉語泠然下水放乎中流于時鵲聲開霽如聞宮
商雁陳遏空恍韻絲竹望楊柳之隱隱聆菰蒲之蕭蕭驢

背風緊能代黃衣之奴馬頭城高欲迎烏帽之客待爽河
漢遊神江湖迴帆溯秋倚檻款夕於其歸也王子命筆爰
爲斯圖同遊者蔣秋吟編修吳蘭雪博士程香谷太守與
余共五人各紀以詩秋吟援筆作記而余爲之引云爾

吳香竹籬下獨吟圖序

寺鐘初動城烏未起澹月在地斜河挂松脫巾露頂散步
門外行不半里乃至吳子香竹寓風迺自葉虛窗不鏜林
影之際有人焉踞坐磐石悄然若有思者則吳子之獨吟
乎籬下也適其友王子椒畦至因出橫紙拉之作圖流烟
入毫潑水成景不事皴染點綴略具半闌風竹之畫一枕
草蟲之詩畫中有詩則無詩焉可也夫余與吳子春明之

語同苔而異岑秋駕之方同牀而各夢離下久寄荒松菊
於十年獨吟爲勞采葛蕭於一日昔東野將行昌黎憂其
寡和中散遠別呂安致其相思則他日者留舊雨於山中
裴孤雲於天際抑可知已聊綴數語重累斯圖情之託焉
顧安能已

杜漱岩詩集序

杜子漱岩雲川先生之曾孫也去天尺五城南表其舊居
明月二分竹西傳其嗣響風骨初舉霞襟已標悵悵宮商
落落絃誦聞雛鳳之聲世稱才子下杜鵑之拜人是詩孫
乃童烏就試之年早磨蝎臨宮之日翻雲手幻破浪心驚
感身世之七哀哭文章之九命君乃東登齊岱北走燕關

綵筆一枝青衫萬里紙貴三都枉傳名於洛下囊空四海
徒乞米乎長安秋賦載吟冬烘盡笑挾齊瑟而罷奏攜隋
珠而自還一痕鴻雪都成春夢之婆半席鱸江竟作秋風
之客入桃源如隔世交桂樹以忘年葢甘爲東野之窮無
復北山之笑者矣君之歸里也移居城東陶氏宅其地曰
映山河築宏景三層之勝遠翠橫樓開恕先一角之圖遙
靑闌戶庾信園中榮畦尙在王維墅裏瓜圃未荒翛然城
郭之偏窗若溪山之表僕也居隣烏柏巷接靑楊流連獨
樹之門躑躅三义之路蘿月同攜其行卷樵風送奏其好
音響霜天之雁櫓慣送清歌鳴雪夜之漁榔閒敲冷句往
往肩與山寒面隨河皺零露沐首而未已片雲上頭而不

知鶴長鳬短來世外之譏評蝶瘦蜚寒足籬邊之風味賦
閒居而自得矢適軸以如何然而熱不因人饑能驅我天
寒袖薄日暮途窮歸雲無出岫之心落葉有隨流之歎時
君將解吳下之帆而問粵中之櫂焉嗟乎湖山有限瘴海
無涯退鷁風高跼鳬水大十八灘頭信波濤之惶恐四百
峯頂看烟雨之合離以健筆之縱橫狀奇情之鬱勃雋而
彌上窮且益工君須達識如莊周之著外篇僕愧知音待
季札之請他樂也

蔡舫仙憶雲集序

趙北燕南古多感慨悲歌之士尊前燭底同是歛寄可笑
之人驚鴻已詡其才名雛鳳更輸其格調名花一粲好鳥

雙聲我輩之鍾情有空王之說法焉蔡子舫仙寶瑟名鄉
胡笳家世慘綠方少題紅已多銅駝巷口幾輩狹邪之遊
金雁驛邊經年漂泊之所兩行紅粉一部雲藍秦后卷衣
之朝吳娃響屨之夜鉤藏女手釵挂臣冠癡甚雲情恍如
夢憶於是借君謨荔支之譜裁微之芍葯之篇燕支之山
欲空鶯花之海斯在嗟乎當歌而人生有幾對酒而日飲
亡何分香賣履笑羊叔子不如滌器當壚學馬長卿亦得
此則鄱陽善謔曼倩工諧凡傀儡之登場悉英雄之失路
乎若夫綺靡緣懷煩華蕩性終無當於好色徒有累乎閑
情達者戒焉非所知已

陸紹聞雙白燕堂詩集序

夫劉勰著例兼尙遣騷楊雄論詩首先辨志儒者之珍斯
貴風人之佩勿諉伐木之咏聽之平心如蘭之言飲以醇
德大雅既邈古懽不存吾友陸子紹聞抱道端居研經寂
守窅焉有本泊然無求叔實之神自清育長之影亦好用
能貌世念於姑射接騷心於水仙珠玉脫口韻流江湖宮
商在身節應風雨焉往者弭櫂西泠落帆南浦嗣依親好
遠涉荆湘懷思不任篇什遂積雙白燕堂詩集若干卷其
作也良朋參差佳日長短里門之暇迺辱過從君以居憂
悄焉無緒東頭之屋待補北邙之山未營雙燕已去感春
泥之故巢羣鳥欲飛愴秋風於別樹方君輟咏遲我言歡
因憶曩遊出觀舊製嗟乎池塘憶弟碧草不春嶺上思親

白雲何世而況僕關山淪落天海棲遲行卷所經前塵斯
在歎麻姑之綠鬢傷庾信之青袍冷硯空敲孤燈欲涕斯
又神思以之銷磨風懷因而惻愴者哉

楊西河九柏山房詩集序

夫蹄涔之水不足以遠江湖部婁之觀非所以希嵩華源
淺者流易竭本薄者末不崇是以抽黃對白墨客之矜才
暈碧裁紅詞人之遣興壯夫所不爲耳餘子何足取焉西
河先生著宏農之望有關西之聲王前盧後繼君家之盛
名周北張南接吾宗之舊里其讀書處曰九栢山房落落
之致風雨助其離奇浩浩之音魚龍資其悲嘯學方干之
問石擬崔立之哦松集之所由名也方其幼也誦李白之

六甲辨楊綰之四聲賦徐鉉之一篇紀王筠之十咏先賜
後拙一家風月之才仲海季江兩小文章之譽頭角嶄其
特立風骨竊而早飛泊乎舉京兆捷南宮焉登龍而御李
膺買駿而圖鄩隗長卿凌雲之賦麟鳳騰其光氣子昇仙
露之詞珠玉爭其聲價繼乃譚傾五鹿講集三鱣戴憑之
席望重乎鴻都袁宏之舟風高乎牛渚蹤跡所至歷有詩
篇白門懷古囊山水之清音黃海紀遊裹雲霞之異色仙
尉之郡前草綠鄂王之城下潮黃攜烟月以尋盟乞江山
而得助往往小胥乍付大雅爭傳葢其詩深於少陵杜詩
鏡詮一書先生所著也筆有諸子箋窮十年人日而咏梅
花東風而拜杜宇夫寶間之遺像如接其音容夔州後之

諸詩獨得其格律有可鏡羣流柱頽波者焉某誼同門子
學愧專家香在南豐尊同北海訂名山之後約記入海之
前遊春明燈火短夢依然秋水樓臺長天忽共今者君將
出岫僕未開船流連話雨之窗商略停雲之樹聊述數語
以志雅懷置之閣上勝楊子之著元經歌向山中當劉安
之學騷體

陳季馴詩集序

余與季馴舊雨十年飄風千里歷歷前夢迢迢古歡晴川
芳草仙人吹笛之樓秋水長天帝子卷簾之閣梁苑早雪
燕臺暮雲清遊旣佳逸興斯舉則有扶風豪士江左名流
亭中晉袂四十二人之稿翰爭飛樓上秦簫二十五郎之

管絃間作浮酒氣以成海沸歌聲之滿天宮商互調珠玉
競落駿駿乎東閣之尊疊西園之軒蓋焉迺者壓海蒼茫
烟江飄泊張融就屋王粲登樓歎鴻雪之重逢慨鷗波之
一往人原有恨僕最無聊而季馴文字緣深湖山興遠遇
秋林而選籟停春院以徵歌時復水竹題名風花說夢閒
才半日悟卽三生異書名士留眼底之雲烟醇酒婦人寫
胸中之塊壘竹濫絲哀之夜金迷紙醉之天一曲烏棲三
聲猿嘯往往淚隨河滿腸與風迴凡茲寓感之辰大有傷
心之作自丁巳夏後得詩若干首分爲卷石山房詩稿歸
雲草堂吟草各一卷石言已悟同歸選佛之居雲意何遲
獨表思親之舍可以見其志之篤心之苦矣暇日復集其

舊時散佚諸作撥劫後之殘灰拾囊中之碎錦別爲一卷
名曰纂餘且以余同遊最久屬敘述其梗概嗟乎途窮日
暮哀長笛之無多海碧天青識斷琴之尙在其能無爨桐
之泣焚硯之思也哉

黃魯山悲秋百詠序

夫豐山九鐘氣感者聲應蕤賓一石響附者景躍此將隕
之泣無假雍門之彈已斷之腸不煩河滿之曲維士悲秋
發言成詠不平之鳴由斯起焉繫其發商颺於齊館騰清
吹於梁臺江山文藻屈宋傷心軒蓋風流徐陳歎逝至夫
城笳悽動隴水哀鳴關前鴻雁河梁落日之篇塞外牛羊
勅勒陰山之唱黃榆蔽野紅柳連天塚草青而霜飛邊沙

白而月墮秋之悲也。至斯乎黃子魯山實維秋士。蓋少
而張儉亡命王粲辭家。近自楚豫遠歷沙漠。零愁彌谷。積
恨崩城。每當清節含凄。蕭晨告悴。風煙獨戾。關河羈寄。凡
夫狄公思親。平原憶弟。參軍寄姝。蘭成贈婦。莫不緘錦帶
以寫恨。奉黃衣而報書。以是言悲。悲可知已。遂乃結響霜
月。流音砧杵。草蟲生遙夜之思。落葉召長年之悲。用激揚
乎情性。匪流連乎景物。彙而成編。厥有百詠。夫李白百篇
徒誇縱酒。羅虬百首祇善緣情。以茲喻體。八哀託端。五噫
采蕭葛以見志。申松桂而爲言。魚網輕苔。宜公同好。慚予
下里。莫繼茲聲爾。

送董巨川之荆南序

三秋賦別稱江郎爲恨人千里壯遊歎董公眞健者時則
吾友董子巨川以庚戌仲秋之月將適荆南應某君幕府
之辟也同人送之郊外命酌爲別濁酒初引清霜下飛雁
蕭寥以叫天蟬悽咽而辭樹山中黃桂有公子之故人江
邊衰草無王孫之歸路嗟乎茲之別也能不黯然傷悽然
泣哉且以足下積元圃之夜光鬱青霞之朝氣而乃馬頭
彈鈇驢背攜囊婁護鯖殘杜陵炙冷習叅軍之蠻語吹幕
府之清笳頻年作奏表春兔於行間壯歲從軍鍛秋鴈於
鞞上亦人生不如意之遭丈夫不得志之會矣然而遠遊
冠好可忘離別之愁飛雲履輕兼有神仙之望挂帆入楚
鼓柁浮江浪與龍吟峯隨雁轉青草蒼梧之鬱鬱紅蘅碧

杜之妻。湘如。變竹。屈平哀郢之詞。巫女如花。柳毅迎神。
之曲。苗婦。跳月之地。映徒。咒風之墟。木瓜。山酸。橘枝。浦冷。
每當。蠶。烟。漲。日。藥。雨。鐘。春。一。彈。蜀。國。之。絃。三。下。巴。人。之。淚。
願言山水如涉。登臨以余壯懷。慰子行役。黃鶴一去。橫短
笛。今各天驪駒。載歌贈長鞭。而首路吟。灞橋折柳之句。代
隴首寄梅之章。凡若干首。敘之云爾。

送方貧谷之蜀中序

余也談鄒衍之九州。夢向平之五岳。遊仙圖其瀛海。招隱
志其名山。況乎薛能詩裏。不負嘉州。李白集中。尤誇蜀道。
棲神莫往。締願徒殷。雖欲從之。末由也已。方子貧谷。以某
刺史聘。將有蜀中之行。片帆乍張。孤鴻欲沒。雲停遠渚。水

咽危橋行者增黯然之傷而居人動浩然之興請申別語
以述斯遊且夫不涉險阻不知山川之詭狀也不探幽奇
不知曦月之殊情也今君度羊腸之棧通鳥道之船看三
朝峽口之牛走八月瞿塘之馬綠熊接響於千丈元熊騰
臂於半空幢日陰森松風騷屑山愁望帝井吊公孫青天
題劒閣之銘白日想刀州之夢作客者鬱鬱居此懷古者
茫茫百端嗟乎籌邊驛在身世極於危樓問字亭非風流
替於古泉過灤西之草堂訪渭南之別業萬里飄流司馬
題橋之筆半生淪落君平賣卜之簾能不顧下坂而傷心
念歸途而動魄哉然而吾土雖非此間亦樂海棠故國盧
橘同鄉鳳奏響於桐花鴨呼名於桃竹君也彈琴臺之琴

貴酒壚之酒。洗箋十色。濯錦千頭。三折巴江之字。仙鯉都
淨一條蜀國之弦。天雞亂落。他日著之吟詠。流入畫圖。城
頭赤甲。翻樂府之新聲。水上青衣。是行人之舊路。夢裏尋
君。行日沒而看日出。卷中寄我。恍江北之望江南。

芙蓉山館九人聯句詩序

歲辛酉夏農部楊蓉裳先生於廐寺得明楊君謙等七人
聯句贈答詩一冊。希出處於曩哲。緬唱酬於古懽。公之同
人已付梓。已閱數月。而周倬雲。姚春木。汪竹素。蔡湘岩。均
以下第先後出都。先生乃招數君。偕蔡浣霞。儀部許青士。
華惇園。兩孝廉及嗣綰。共九人。集芙蓉山館。仿聯句故事。
時爲十一月朔日。殘雪在地。飛霜下檐。松寮孤青。竹屋一

白梁園之簡斯折金谷之筵乃開香山結社擬九人之勝
遊淮南留客援八公之成數迺敝瑤席煮瑤麋五辛雜陳
三雅交錯鶴飲甫畢驪歌已申童僕在旁請進子墨主客
離位遂相聯吟酒氣成雨呵硯冰而忽流茶聲作濤沸窗
紙而逾響或搜韓孟之鼎或撥陰何之灰清緒迭引孤懷
互投賈島索句門外極其推敲陶潛問形室中勞其贈答
華燈幢幢不假燭刻寒柝隱隱如聞鉢催漏三下得聯句
長律詩一首九人贈答詩共一十八首夫以吾輩苔岑共
盟山木相悅秋駕將返冬心易孤舊雨今雨流別淚之浪
浪團雪散雪申離詞之旦旦流水一別浮雲四飛洪喬江
上知來日之書難高惠夢中恐今生之路斷所賴星河雖

阻泥雪長留後者難期無忘斯會云爾

陶然亭餞秋詩序

北郭雨霽西山翠流重陽旣展坐益離索素秋二七悵清
節之將歸良朋三五緬雅遊而誰續葛蕭之興已遠松桂
之招忽來時則九月二十九日同人觴於陶然亭舉餞秋
之會也賓多於鴻僕健勝鵲霜風送響乃涉平原黃蒿過
人深不見日數車銜尾殷聲若雷沙高成邱途隘入街如
是數里方登斯亭同人乃褰衣裙歷階級踞石而坐攀楹
欲飛風竹疑嘯上千層簷霜楓如醉排入虛牖亭外積水
半成方塘野禽拍波來弄寒色直視遼廓城陰周遭蘆葦
下偃方作晴雪烟鷺一點似棲仙心昏鴉滿空疑潑顛墨

苗席既薦壺觴遂開折花當籌捉松伐麀談謔間作繼以
狂歌鶴聲墮地遙鏗宮商鴈路界天府照金碧已而林暉
漸移秋影將去衆鳥離樹哀鳴裊裊輟觴凄然興盡告返
落日蒼莽舍車而徒青鞵互蹤烏帽低影鬼火奪路人烟
失村破冢連屋當日黃公之壚荒碑臥阡昔年到漑之石
忽朝忽暮何古何今斯又酒人見而傷懷秋士因而隕涕
者矣同人曰是會也請有以志之於是諸子賦詩而余爲
之序

姚春木萬里圖序

姚子春木旣罷秋賦將辭春明離筵甫張別酒斯把於時
烟鷁流響霜鴻叫空吹角聲之曉寒挂鞭影於殘雪迺出

萬里圖幘屬同人一言爲贈圖凡三十有二各繫贊語但設標目不假繪事有聲之畫對松風而忽開沒字之碑披蘿月而能讀結想於邈棲襟欲仙近自楚越遠逮秦蜀紀山川之勝懷溯鄉里之情話吟覽所及曩而爲圖今春木之歸也過蠡水入鱸鄉橫雲罨山圓月流泖懷人七松之觀弔古五茸之城僕如君年遊跡斯在鴻爪猶雪鷗心自波永念昔觀徒增勞佇夫行百里者半於九十勞逸之殊致也憂萬里者失於尺寸得失之殊效也春木蘊夜光之壁鬱朝霞之氣興驚六合騁馳八埏長風之願未知所極泥蟠之歎良非所期僕齒將衰壯遊已倦五岳可適禽尚之志未償三徑待茸羊求之契罔託此中出處昕夕憂之

人海波危關河日暮行矣春木相見何年生別新知渺懸
天未請裁數語書之幀端

倪米樓畫隱菴詩序

余以甲寅春客津門始識米樓知其能填詞希風姜張迥
絕近韻所刊翦雲樓詞其最先作也既復見其四六文及
所爲詩栖襟道山振骨蓬島卓達觀以表識鍊清氣而爲
言其於古人企可及也既處都門遂同燕好非有瓜桃之
戚用篤昆季之愛鷄鳴膠膠不輟念於風雨馬蹄隱隱乃
遜情乎荒遠愧居十年之長尙友千載之前者焉乙卯秋
君試下第旋以外艱出都門於時贈策蒼黃含詞懷慟松
栢相悅方敦其古歡芝蘭並焚忽傷其同類蓋不旬月而

余奔先君子之喪矣今年夏余就食江右權出武陵時君以避暑居湖上之栖霞嶺徑詣茆菴爲止信宿晤言山鬼之室留夢碩人之阿復出其畫隱庵詩示余停雲奏篇閱水成歎往者游好半寄此中歲月失歡關山增愴一牋在望明發首途西陵渡口獨裁遇風之詩桐江道中空來濯纓之慕與子偕隱懷哉何期請書簡端以志吾別

錢筠邨遺詩序

錢君筠邨竹初先生之子也家有素風少無俗韻颺風拙月門第溯其清徽讓水廉泉里居表其勝致緬離井邑隨宦浙中幼居官舍隱几四明之山長遊壻鄉放船百粵之島歲戊申巳酉間竹初先生以解組歸里門結念蕭寥崇

情澹白庾彥寶之山池遊心物外仲長統之田宅樂志閒
居筠邨克侍晨昏終鮮兄弟家箴是錄客譜勤修應事則
穆之百函踐言則季布一諾用能慷慨任力綢繆致思湛
之著屨之訓安不忘危士行運甓之功勞而待逸當其溫
衾問夜撰杖娛年潔南陔之膳薄采芳蘭申小山之招載
賡叢桂其讀書處曰分綠山房積書十楹栖塵一榻主或
坐隱客來臥遊玉唾隨落雜以蕉桐之聲清觴迭陳佐之
菰韭之味閒好音律偶綴詠歌蓋楊綰之述作秘不示人
殷浩之周旋久寧作我焉夫其偃仰庭廬追隨倫好非必
德行之懿書留三篋文章之美價敵百緡而僧孺之識仲
郢風矩斯存文淵之懲季良義方有在彼柳敬禮衣纓結

習蕭深滌裙屐少年徵逐車騶遊獵狗馬浮榮相競清議
安歸不且得失之殊塗而趣舍之異致哉嗚呼可以風矣
今年夏同客暨陽寓舍一日薄醉邀余散步過劉伶之巷
憩杜康之橋忽顧影形縱談身世君性故近躁未能好以
暇也要之以孔明甯靜之語進之以韋簣逍遙之風首肯
余言恍然有得豈知蘇卿一別常負景光張敏三尋遽隣
泉路中秋之前二日君歸自東郭見庭蘭作花忽忽心動
語家人曰此非佳兆也古藤之讖淮海先知白楊之悲泉
明早達遂於是夕得病病旬日而逝竹初先生抱西河之
慟制延陵之情揚雄悼子元章惜其失傳徐勉喪兒哀詞
爲之輟筆因檢篋中得詩數千首冀留遺澤及付諸孤持

以示余悽然殆絕昔竹林之遊向生感舊蒿里之餞杜陵
述哀而況師友可作竟觀乎九原昏嫁未終長遊乎五岳
以余戚好恰子生平弦望甫周山河永邈范式不來感靈
旗之告夢張融已逝思塵尾以招魂此又淚盡三號而腸
爲百結者哉

許玉年悼亡詞序

許子玉年以乙丑三月結褵於吳門之呂氏甫六閱月呂
孺人卒余適以事道過武林玉年出示悼亡詞若干首纏
繆騎省之作惻愴子荆之喪擬進達言先成悽咽既復手
一幀淚熒熒然向余曰此亡妻遺像且請一言玉年故工
繪蓋追寫之以寄其思者也夫以璜玉之清門匹飛璫之

望族仙裙百摺駐若雲霞寶扇半規障來星月玉臺破扇
山雞對舞玳梁深而海燕交栖女史之箴早書姑恩之曲
方奏宜其婉好永此芳華而廼骨瘦飛龍心驚別鶴袖常
倚翠綃易啼紅空吟陌上之花未識西陵之栢桃天乍賦
杏嫁旋殤孺人之幼也卽以孝和將屆歸寧先期永逝時
蓋中秋前三日也嗚呼問姑衛水駕松舟而不歸望母齊
亭別栢宮兮長夜烟消吳市之玉靈卷秦樓之衣路絕人
天渺難卽矣今者聆廣寒之樂紫府虛圓望清淺之河紅
牆永隔明明割字春人雙倚之欄鬱鬱埋香秋草重生之
徑簾旌欲斷麻響難尋蘅蕙裏而不芳芭蕉展而仍結所
賴遺挂猶留墮釵可拾唾點長碧唇塗不朱郎原京兆眉

借圖開壻昇連波腸隨錦斷僕慚無長筆雅善哀情代泣
瓊瑰如聞環珮指曇花之一見歌琪樹而全非七襄機在
誰挑續命之絲九子螺殘剩表傷心之碣

葛麗農庚申集序

鏡水一曲似知章之故居屏風四山題開府之新詠中有
葛井實依于湖翼以薄遊得接譚譙舉雜草以爲佩選孤
花而表襟挹子清風爲日久矣素秋旣晏重抵斯土懸榻
聽雨依鐙寫秋因出庚申集一卷示余曰入此歲來所得
詩也新露盟水古雪浣腸宋艷高摘顏金互錯江淹之三
十體蕭統之十二書令讀者流連景光悽惻朋好焉僕也
閒鷗再盟客燕將返秋社猶白寒山罷青明戒僕夫逝將

去汝孤舟識路一塢停雲攜樊南甲乙之集便當離歌過
潤州丁卯之橋還流別淚請綴荒翰有累華編落月在梁
照我顏色

吳西津先生詩集序

館娃之東延袤數里塢影落白巖光孕青人文蔚然歷有
年所此沈石均張永夫黃野鴻盛青樓四先生沈文懿定
爲木瀆四詩人各有專集芳草充佩喬松蔭裾自然德音
誰與嗣響則吳西津先生其人焉每當霞朝月晚水暝烟
初阮屐雙穿郭巾一角草芳牛牧之觀花落驚飛之橋荷
鋤入圖攜榼成吹謝幼輿怡情邱壑仲長統樂志田園量
晴課雨儲太祝之天懷鋤月畔烟王右丞之逸趣悅戚話

以選夕娛賓筵而永朝敦篤倫好維持風節池草入夢陔
蘭采香一篇之中三致意焉余以庚申之春小住香溪閒
尋靈麓識短李之貌古欽迂之致高味甚賅茗瀹清泉
以論詩交如飲醇命濁酒而更酌今者黃壚頓暮白社方
秋樵蘇未希烟水斯邈蓋去先生之沒已六年矣猶子磊
齋敬奉心香追維手澤執杜老之卷蒿里述哀過向生之
隣竹林下愴謂余後死因省前塵願乞一言以藏三篋余
也觀河而緘逝水心長琴尊之好懽若平生烟素之緣感
深兩世泥雪猶在星霜已非忝綴蕪詞以告來者

金樓泉三十六陂春水圖序

懿夫愛敬陂成邗水分注康濟河闢湖支下通莫不分鄭

白之渠形侑甌閩之海派若夫樊果甓社珠川平阿若洮
若瀾之滙源爲瀾爲漩之蓄勢席挂萬里船扶千尋篙師
蕩魂舟子失色則尤高郵五湖所稱巨浸也前明嘉靖間
仁和金公樓泉出刺是州慮其混一請於巡按分洩湖流
開石梁導石白濬秦蘭障洪澤增隄順軌築堰分支淮流
旣清湖漲亦靡此三十六陂春水圖所爲作也以彼水影
杯瀉川痕鏡平鷺鷥不驚魚鳥自集菱津葦蕩剛船謳之
互聞荻渚蘆洲正漁笛之吹入青山向背夕陽低昂過者
無江漢中聲游者有濠濮間想焉僕以勞人屢經湖次泊
舟邵伯之埭弭櫂耆卿之橋珠光兩岸看甓社之波廻墨
色一旗覺秦郵之酒熟適九世孫中書君應麟條公治績

列之家乘復展斯圖徵余作記暇日過從不鄙無文因感
前徽兼懷塵躅率荒翰書之幀端

同人銷寒詞會序

野火東風有蕭寺之連客梅花人日來草堂之主人門外
積雪是爲袁安之居厨中斷烟乃曰梁鴻之竈不有雅集
曷勝古懽請以填詞聊申寫韻慢聲隔竹疎影當松雨中
爭唱笛家月底並修簫譜時也熨翰林之濕薪煨長史之
獸炭烹學士之雪水辦太常之寒盞缸面之酒試乎春醪
盤中之餐調以鄉味歡卜盡夜詞成不日搜韓孟之鼎撥
陰何之灰馬遲枚速文思盡平一朝燕瘦環肥書評及乎
千古童僕先折其簡主客乃開其圖序唐人之四傑誰在

盧前招燕館之諸賢請從隗始

彭石夫八詠圖序

余與彭君石夫相識於時帆先生之詩龕十餘年矣粵歲
戊寅遇法源寺朝夕過從因懷古懽乃出朱子鶴年舊所
補圖並示八詠蓋自垂簾市肆下榻僧寮問渡沿河停車
望岱已而春明滯迹秋駕羈身荒車鷄栖冷巷驢券遂思
問字乃遇詩龕葦塘淨業看十刹之風波梧院清心聽六
時之鐘響入世已久清門乍凋維時時帆先生及令嗣桂
山皆去世矣牙琴海上悼綠水之何歸禪榻風前憶青鐙
之有味迴念寺近危橋鶯花劫遠潭尋積水鰕菜亭空而
君尙戀浮名猶淹旅況因懷鄉里輒感關山河邊下水排

信州志卷之二
濁浪之千重隴上看雲送青州之一色東圖書而載道移
卷軸以言歸不亦故里之鄉心而名流之逸事哉

庚辰三月三日泛舟二閘修禊序

歲在庚辰三月三日泛舟二閘稱修禊焉於時閘響如瀑
壇高於林攜新社之兩三兼故人而二八亭前泛羽扶柳
帶以開筵砌畔流觴映桃花而入酒玩鳴鴨之出沒數魚
魚之往還筍輦踏處近沿曲水青痕芝蓋飛來遠耀華林
翠色草堂賽二十五郎之管藉草思眠蘭亭勝四十二客
之篇握蘭更喜紫姹紅嬌之候金迷紙醉之天狂語爭喧
謔言迭出時也浮白旣足蹋青斯遊非無隧道看翁仲以
尋碑別有閒圍說金人之捧劍於是繞叢采采點薺依依

攜小山之隱君及大樹之童子解漿離岸移壺上船去水
重重歸途黯黯城遙匹練郭近漁衣玩春逕之三三夢紅
浴碧喻秋林之七七轉綠回黃遂繪景於丹青亦吟詩於
烟素是集也彭春農鍾仰山兩學士爲主人而朱野雪王
楷堂何仙槎劉眉生朱芥堂穆吟濤穆見亭岳湘巖岳兼
山周雪樵周小石同集比部文雨溪之軒期而未至者則
有陳石士董琴南而遊戲往來於其間者則有野雪令嗣
大樹童子也遂屬野雪補圖而余爲之序

韓景圖紅冰詞序

韓子景圖少以新柳詩得名東風御柳一城寒食之篇西
蜀桐花萬里丹山之曲然但識其詩才之清而未知其詞

筆之雋也因銷夏之餘閒極搜春之能事乃出紅冰詞示
余剪水才工裁花骨妙冰乍調於絃上紅可貯於壺中杏
花開遍宋子京之盛名梅子黃時賀方回之佳句蓋近代
梁溪詞人以梁汾爲宗興託周秦而旨歸姜史君之瓣香
固在彈指焉夫以雲水爲鄉烟騷作主雪後雙屐霞邊一
觴花開鼓子流豔曲於空山菜長瓢兒宕幽懷於古澗每
當新魚淦淦晚雁濛濛雨槩自飛風弦獨韻目秋江兮愁
余吹春水兮千卿折荷花而白地斷腸倚竹枝而紅霞脫
口兼以采藍興遠拾翠情長水北迴鐙湖西挾彈記眉痕
於樓角尋酒暈於闌干死央小夢隔南浦以能來蛺蝶前
身繞青陵而不去識佳壻於微雲山下唱女郎於殘月風

前宜其豔奪紅牙哀逾白石矣僕也鵝管生涯烏絲結習
朝朝儷曲昔昔清鹽今綺陣之將消早閒情之爛賦門外
之綠陰已換水邊之紅豆都拋所幸禪榻重尋旗亭近賭
脩蕭譜於三生同來月底唱笛家之十里尙在江南此日
飛花墮絮好填成三影之詞他年朝雨輕塵愁聽到四聲
之曲

陳愛蒼白門惆悵詞序

僕本恨人唱白門之楊柳卿須憐我憶山上之蘼蕪西風
書不展之蕉南國記相思之豆則有如惆悵詞者陳子愛
蒼緣情之作也方其作三春之蕩子署六代之寓公青谿
白石猶在人間碧漢紅牆便如天上嬌郎抱日有美如雲

葛鵲兒之小字。嘯上三絃。吳蚨蝶之前身。飛來入拍。瑟長
於妾。簪暖因君。橫陳黑瘦之筆。低唱綠肥之曲。仿眉圖於
畫柳。臨字腳於簪花。一龕繡佛。星星繫臂之盟。四角香囊。
叩叩定情之什。旣而秋娘送別。春夢還家。虛望檀來。竟歌
郎出紅葉長辭。萬古宮人之恨。石榴一笑。三年越女之緣。
花從風去。兩地漂流。泥憶雲來。漫天惆悵。遂使文鴛影散。
彩鳳身飛。珠買歌歸。雲隨舞散。叩三生而石在。搖九子以
鈴空。於是縑素封愁。雲藍寫恨。借葛三之佳話。爲陳九之
新詞。斯則柔腸寸寸。牽錦段以同迴。怨曲聲聲。擘箏侯而
入破者矣。僕也清淮十載。濁酒千場。湖海氣銷。瑯琊情死。
三千殿腳。瓊枝璧月之園。廿四航頭。落葉繁霜之譜。猶憶

丁嬾簾閣甲夜闌干葉子拋金搔頭贈玉書放翁於團扇
圖白傳於屏風情天切短夢金粉而都消淚井痕深洗燕
支而不去今者過楊白故宮之路蹋槐黃舊內之烟萼蒲
再發如君未嫁之年桃葉雙招是我重來之地秋蝶魂消
而不返春蠶絲盡而還纏記司空之見慣淚染綃紅感杜
牧之遲生陰成怨綠宜乎桂駟病損衛虎愁多黃絹憐他
烏絲累我袖尙留乎紺碧懷已滿乎瓊瑰從此小名錄上
珊珊聽玉珮而來長恨歌中冉冉寄金釵而去

蔣嘯軒漁樵問答圖序

昔邵子探月窟之精微悟雲窩之安樂樵水漁山屑清言
於世外贈形答影參妙諦於胷中此漁樵問答所以有無

名之名而爲忘象之象也吾友蔣子嘯軒偶借寓言遂傳
真境肖化工之筆開太極之圖萬亦印千一能生二東坡
有百太白成三四時俱妙其丹青一室獨涵其虛白山光
悅孔雲影怡陶烟水迷離林嵐合沓策策堂堂不辨庚辛
之氏丁丁坎坎都忘甲子之年斯固吾愛吾廬而我無我
相者矣僕也烟霞悅其魂魄泉石結於膏肓傲漁唱兮一
家逐樵歌兮九轉洞口船歸但飽桃花之粥山中柯爛曾
看橘子之棊足使任公袖手而來巢父掉頭而去以此逍
遙身世擺脫塵埃蕉間鹿幻夢回古澗之尋竹上鮎來心
冷空江之釣但漁樵之了了何問答之云云然則對斯圖
也采山而釣水漱石而枕流得意須忘靜觀自足一片空

明惠子濠閒之水兩頭迎送鄭公溪上之風僕也且將從
漁父以下居君也幸勿爲樵夫之笑士

樂閒書屋遺藁序

樂閒書屋遺藁者余中表弟虞旭岡作也君少穎悟十歲
能屬詩家世珥其華紹才名吐其白鳳年十七舉順天鄉
試旋以黃筭處得中書常衮稱職能爲除書張華入官卽
與制誥方其紫薇夜值紅梨晨校鳳池之筆莫奪龍門之
聲獨高然昌黎篋底三書不存正平懷中半刺將滅循其
風旨有足觀焉歲壬子余自洛中入都契濶歲時重得敘
處君雅好客備極游宴一燭未跋八音共調譽王褒於洞
簫識高琳於浮磬興來則擊鉢能下思入則停鐘不眠往

往义手之作爭捷温岐嘔心之篇鬪奇李賀焉時余舅氏
方里居君假歸省癸丑春重試禮闈旋復報罷圖市駿而
猶索券賣驢而已空一車雞栖盡室鶴望居恒多忽忽不
樂顧不以爲意也一夕飲友人所歸寢而復起邀余出庭
前步河影於虛檐弔蟲聲於短砌索筆作五言二章中有
冠蓋去如雲落花填古巷之句薤歌尙樂梁商之懽不終
橘頌入騷屈子之命將絕蓋不數日而君病病七日而君
死矣君年三十無子妻若女俱在都下將以某月日奉君
柩南還夢見亭遠吳樹連天望夫石高燕山無地招魂瘞
鶴之里墮淚聞鵲之橋素旄出門黃壚何世君之存也曾
以所爲詩屬余刪定今檢其遺篋合古今體得百餘首爲

集而錄之成君志也嗚呼蟬蛻將去猶自戀其殘聲蠃魚
已仙誰復尋其賸字天平何酷此子不使永年生也有涯
達人安能無慨埋玉樹而長已化瓊瑰而不收夫孝穆酬
總持之句方寄集中陳思定敬禮之文竟成身後疑君未
死喪予平生手墨猶新音塵終古可傷也已

張舸齋飲綠山堂詩集序

蓋夫應官聽鼓吏才無邱壑之懷仰屋著書處士乏江山
之筆夫惟大雅始號通材萬靈芝以表德音拾香草以充
雜佩如吾友舸齋先生殆其人也家居鐵甕門對銀山年
年送客朝南莫北之風日日江流楚尾吳頭之水先生生
齊白傳幼卽黃童叔寶神清育長影好銀杏金桃文暢知

名之句卿雲仙露子昇得意之篇遂乃譜鸞鷟之雙聲匹
鳳皇之五色其夫人鮑氏則海門先生之女雅堂先生之
妹也金釭二等尺許量才玉鏡一臺壺能潑墨詠庭前之
絮起鈿閣依依唱陌上之花開香車緩緩一時閨中有葛
鮑之風劉樊之望焉先生則飛雲舄輕遠遊冠古攜筇就
海蠟屐尋山武夷九曲櫂入空濛盧阜五松屏張雲錦三
十六峰寫奇情於雁宕二十八洞圖詭狀於獅林嘗繪四
山紀遊圖以傳余向有句云三山住家四山客蓋記實也
所以澄懷度日樂志忘年山有眉開水無面皺基只平心
但看爛柯之局琴常斂手不登焦尾之場宜其謝舅何甥
周郎陸弟敞賓筵而結社選戚話以買鄰也君詩飲錄山

堂詩集已付梓者十四卷詩境清真恬曠進而愈工沒而
彌旨編樊南甲乙之集唐韻堪酬過潤州丁卯之橋鄉音
迭唱蓋元白之閒置一格焉僕也與託張南忝居王後吳
江波遠人海風高飲綠水以盟心望青山而表悵慚皇甫
謐之吟三都作賦置鄭當時之驛千里傳書

鄭太翁七十壽序

燕山五桂何北地之才多商嶺一芝獨東園之望重椿八
千而始大萊七十而方孩是惟居丈人之行斯爲得壽者
之相惟我某翁河閒舊族谷口分支六經崇漢草生教授
之山三絕工唐葉貯慈恩之寺詩學弗墜歌鵬鵠之一篇
文名早高夢鸞鸞而五色年十八補博士弟子旋業成均

題名鳥過鳳闕非凡燒尾魚來龍門輒退劉蕡有再下之
第蘇秦無十上之書然而韋賢教子世守一經鄧禹生兒
兼通百藝雖王謝盡知名之士亦甘陳得學武之才蓋長
君某已班筆先投而次君某則江花入夢戊申中式副榜
補覺羅教習期滿以知縣用驥足千里鳳毛一門能世其
家克昌其後者矣而翁且嘯傲平林泉逍遙乎里社韋杜
二曲朱陳一村張公雅誼不爭大谷之梨杜老高風任撲
鄰家之棗粉榆設宴雞黍留賓傲博士之瘦羊爲諸生之
祭酒優游之樂鄉黨稱之厥歲建寅於年書亥留七夕雙
星之讌侑一堂二老之觴瑤池使到望鸞背以長青銀漢
填過喜烏頭之不自某分同葭戚言締蘭盟夙仰心徽用

綏眉祉借南陽而挹水傾北斗以承漿仙郎作令九霄看
鵷影之飛國與開筵三殿聽履聲之到

刑部主事魏君尊人七十壽序

代

翼軫紀分星之野而少微位傍三台匡廬稱毓秀之鄉而
大隱居鄰五老所以林下之風補丹青於洛社橘中之樂
陪黃綺於商山如我某翁先生其人也先生郃邑起家鶴
城著姓一室歌鐘溯宗功於金石兩朝文笏濟世美於簪
纓弱翁之裔皆賢畢萬之宗必大方先生之少也禹甸重
食德之報漢京開力田之科一斗之粟不入乎民謠滿籩
之金不先乎庭教置銅盤而合食設大被以安眠聞者謂
閔騫兄弟家無閒言識者知楊震子孫代有陰德旣而嗣

君某荷衣就塾柳篋陳編庭麥晝漂寺蘿夜斷加邨鑒餐
厨之飯課歐陽官燭之書方犀角之初豐卜鳳毛之必貴
歲甲午嗣君舉於鄉甲辰捷南宮入比部見楊綰之官箴
早推國器乞柳遐之坐具猶記家規九棘風清三槐露重
蓋自魚須一乘鳳勅旋頒堂上鱣來門前燕賀宜乎安車
以當潘輿衣錦而承萊綵矣而先生則辛苦持家運陶公
之百甓儉勤風世守晏子之一裘竹頭木屑之經營菜把
酒材之擘畫有覺德行無忝貽謀若夫龍伯高擇言無闕
杜京產敦行爲難鄉鄰難急得輔嗣而動容族黨風奮見
子將而變服甚至輝分東壁水貸西江脩鶴觀以營齋建
虹橋而利涉古人云好行其德先生之謂乎迺者葭瑄飛

灰菊泉益壽庭前履襪座上簪裙杖已刻乎春鳩萐并輝
夫夏翟某等同居仙尉之郡竊忝朝士之班絳縣圖開青
田酒進借麥邱而獻祝吹黍谷以陳詩他日青牛去後傳
關前小尹之書此時元鶴飛來添海上仙人之算

蔣母張宜人七十壽序

代

蓋聞郡依梅尉仙人之眷屬偏多山接麻姑阿姥之容顏
尙少則有蔣侯宅近門通白水之梁張使槎還家貯銀河
之石而況班宗七戒孟舍三遷堂前講幄拜文宣之女宗
天上幔亭列武夷之仙宴者乎維我蔣母張宜人族高許
史村並朱陳舊籍占小山之桂曾住淮南名家傳大谷之
梨遂移江右宜人甫離毀齒早識柔嘉纔及齊肩便徵淑

如氏之傳經學名重女孫謝宗之詠詩篇望逾男子既而仙館鵲填女牀鸞集仿內家之譜便出雙眉臨奴婢之書都成一手典裙釵而佐讀脫簪珥以傳餐牛衣不事早成夫子之名象服將加克遂尊嫜之志以舊家之有子博新婦之宜男雍雍乎肅肅乎可以垂女史之箴繼姑恩之曲焉未幾而家傍鳳池人登雁塢太史旣紅綾入宴夫人亦翠幃來朝因風解佩三生聽碧玉之珂伴月薰香五夜豐青綾之被時也諸生立雪名士如雲館盡招賢座常滿客入林樾阮俱邀品藻於山妻出世羊求亦仰音徽於社嫂蓋元才子之名禁中特定而邨夫人之德世上爲難方其潘岳迎輿同遊吳下葛洪徙宅小住秦淮一雙白板

閒開蔣徑之扉廿四朱航近汎袁家之潛一時見者有神
仙之望焉旣而扶風帳設元禮門開惟士無田寄公有母
蘭亭攬勝山陰題扇之書隋苑游春陌上看花之什邀令
輝而茗話選道蘊以蘭言留萱作愛都成客舍之棠爲竹
生慈願插官河之柳泊乎瀛洲再召溫室重依一院金蓮
之影老子婆娑三株玉樹之輝諸郎競爽喜新鶯之並出
知老鶴之將還兼以官況泉清病軀山瘠問酸寒於杵臼
窮辛苦於刀圭所以纔轉南臺便辭北闕當朱履退朝
之日正斑衣歸里之年買來丙舍堪當青山仿得午橋便
如綠野上紅樓而度曲開白社以成圖婦姑春日同聽曉
曉之鶯子母更闌對話團樂之竹雖復偕老願違未亡念

切而夕陽紅好暮景長留寸草青多春暉不去宜其姓聯
翼軫名曜娥西池少女親鑄玉琯之書南嶽夫人代掌
金箱之籙也若夫雞黍之供親饌孟筍尤甘魚菽以祀先
人季蘭倍潔織婦針神貴而克儉厨娘寵妾賤亦知恩讓
鄉廉里人懷長樂之居義路禮門世重獨孤之望甚至覓
裴航而借杵無限藍橋旌嬰女以留砧有如白水妝臺摘
粉自書幼婦之碑畫閣催妝代撒嬰兒之填凡此高風都
成懿行斯又吟之杼軸縑百匹而應空佩以玕璫繡千絲
而並貴者矣迺者剛逢添線之辰適屆開筵之節娥方望
月婺亦占星金仙掌上盤承天姥之漿玉女牕前壺博井
公之粲大小雙姑畫開顏於明鏡匡廬五老羣拜祝於香

爐某等潘楊之戚叨列通家孔李之交更兼兩世三篋久
書其素範一觴聊獻夫華辰從此集青鸞於海上常捧箋
來如其招黃鶴於江邊誰攜笛去

太常卿王公祭文

代

維公族望實著齊魯槐蔭植三孫枝秀五行馬在門封貂
列戶玉昆金友爲世翹楚離離黃菌奕奕紫芝公之異表
徵於幼時誦六甲篇賦四聲詩能習豹韜能騁鴻詞小試
厥才首膺河務魚須在署驥足展步賈讓決渠王尊濬路
得上上考均下下賦作二千石守郡滇南銅龍之江碧雞
之嵐猗花穠草懋此棠甘公饜飫之飲德譚譚繡衣持節
臨疆問俗躬勸勅耒手披案牘使馬如羊買牛用犢吏治

稱良民風以睦軍書戒途轉粟飛芻出入萬里馬瘡僕痛
青藜籌筆贊皇繪圖克靖狼煙以佐虎符惟浙東西一歲
遷秩乃膺 帝簡廉鎮用辟曲蓋迎幢檐帷列戟獄訟平
反好是正直 帝曰還朝職在太常容臺之禮雲韶之章
伉伉六經翼翼三綱賴此介卿夙夜匡勦侍直剪髮隨班
朶殿 天顏詢及温室時見苦縣益齡甘泉賜宴世重叔
孫人誇景倩曰歲乙巳千叟登朝鵠立虎拜濟濟羣僚天
台之杖建此霞標蜀江之錦映以雲綃 帝念老成殊恩
無已 北闕拜書東都設醴榮逾廣受德高園綺鶴笏在
牀萊衣歸里濟水之前有林有泉汶陽之側有宅有田龐
眉豐鑠鶴骨翩躚杖履逍遙十有餘年枌榆選懽桑梓致

養徵朋白社課農綠壤何甥謝舅殷兄張丈投轄卽來
壺並往維公敦俗贍給務周義田立法歲必舉脩有禾在
囷有麥在舟惠流黍谷澤美崇邱惟公勸學別設鄉塾克
岐克疑以養以育學禮五百傳經十六用勉青氍同趨終
幄晏子一裘惠文一冠惟公克儉樸返淳完朝習梁春莫
運陶甓惟公克勤持家有節公之承先清白栖心數傳祖
笏一世官箴公之裕後澤身於古功佐書倉業窺學圃如
何天道榮悴靡常鵬止其室鱸去其堂哲人云萎大雅斯
亡門無端禮殿失靈光疇昔之年登朝後先惟鄉之老緊
國之賢書綴賸篋佩德猶弦逝者已矣風流邈焉傷哉古
今視此且暮堯典入棺虞歌在路鬱鬱槐風蕭蕭薤露魂

兮了知鑒此心素嗚呼哀哉

荷綱堂文集卷二終